

Kichwa cha Kanisa

Naye ndiye kichwa cha mwili, yaani, cha kanisa; naye ni mwanzo, ni mzaliwa wa kwanza katika wafu, ili kwamba awe mtangulizi katika yote—Wakolosai 1:18.

Tangu kupaa Kwake kwenda mbinguni, Kristo amekuwa akiendeleza kazi Yake duniani kwa njia ya mabalozi Wake aliowachagua, ambao kwa hao amekuwa akizungumza na wana wa wanadamu na kuwahudumia katika mahitaji yao. Mkuu wa Kanisa amekuwa akiongoza kazi Yake kwa njia ya vyombo vya kibinadamu vilivyoteuliwa na Mungu kufanya kazi kama wawakilishi Wake.

Msimamo wa wale walioitwa na Mungu kutenda kazi katika neno na mafundisho ili kulijenga kanisa Lake ni wajibu unaohitaji umakini mkubwa. Kwa niaba ya Kristo wanatakiwa kuwasihia wanaume na wanawake kupatanishwa na Mungu na kisha wataweza kutimiza utume wao tu kwa kupokea hekima na uwezo toka juu.

Watendakazi wa Kristo ni walezi wa kiroho wa watu waliokabidhiwa na Mungu kuwatunza. Kazi yao inafananishwa na ile ya mlinzi. Katika nyakati za kale, ilikuwa kawaida kwa askari kuwekwa juu ya kuta za miji, ili katika mazingira yao hayo mazuri, wayaangalie na kuyalinda maeneo na sehemu muhimu na kutoa onyo endapo wangemwona adui akijiongelea miji yao. Usalama wa watu wote waliokuwemo ndani ya mji huo ulikuwa unategemea uaminifu wao. Katika wakati uliokuwa umepangwa, walitakiwa kuitana, ili kuhakikisha kwamba wote walikuwa macho na kuwa hakukuwepo na madhara yaliyokuwa yamempata mmoja wao. Ukelele wa kutiana moyo au kuonyana ulichukuliwa toka kwa mlinzi mmoja kwenda kwa mwingine, na kila mmoja ilimpasa kuitikia sauti hiyo kwa kurudia mpaka mwangwi wa sauti hiyo ilipokuwa imezunguka mji wote....

Ni fadhila kutoka kwa Mungu kwa walinzi walio kwenye kuta za Sayuni kuishi karibu zaidi na Mungu, na kuvutiwa kwa urahisi na mguso wa Roho Wake, kwamba Anaweza kufanya kazi kwa kuwatumia ili kuwaambia wanaume na wanawake hatari inayowakabili na kuwaelekeza mahali pa usalama. Kwa uaminifu inawapasa kuwaonya juu ya matokeo ya hakika ya kuvunja amri za Mungu, na kwa uaminifu kuyalinda maslahi ya kanisa. Hakuna wakati wowote wanaotakiwa kulegeza umakini kwa kazini.... Sauti za tarumbeta zinapasa zipazwe na kusikika, na kamwe hazitakiwi kutoa sauti yoyote inayochanganya ama isiyoeleweka....

Yeye atumikaye katika bendera yenye alama za damu ya Imanueli ana jambo hilo la kufanya linalohitaji juhudi za kishujaa na uvumilivu mkubwa. Lakini askari wa msalaba atasimama bila kuogopa katika mstari wa mbele wa pambano.... Anatambua hitaji lake la kupokea nguvu toka juu. Ushindi anaokuwa ameupata ... humfanya aegemea na kumategemea kwa uzito zaidi na zaidi Mungu Mwenye nguvu. Kwa kutegemea Uweza huo, huwezesha kuutoa ujumbe wa wokovu kwa nguvu zaidi na kuufanya uteteme ndani ya mioyo ya watu wengine....

Ni kwa kumwangelia Yeye Asiyekonekana ndipo nguvu na uwezo wa nafsi hupatikana na mamlaka ya dunia dhidi ya akili na tabia huvunjwa (Matendo ya Mitume, seh. 2, uk. 48–52).